



Ad Arosa vegn betg votà electronic sco a Cuira en la sala dal cussegl grond. Quai è er stà il cas tar la tscherna dal nov president da la regenza grischuna.

FOTO G. N. STGIER

«Davaira in mument emoziunal»

Christian Rathgeb nov president da la regenza

DA GION NUTEGN STGIER / ANR

■ **Resultat onuraivel per il nov president da la regenza grischuna. Il parlament grischun ha elegì il cusseglier guvernativ da la Partida liberaldemocratica cun 109 vuschs. Vicepresidenta daventa cussegliera guvernativa Barbara Janom Steiner e retschet ha ella 103 vuschs.** L'emprim tractandum dal segund di da la sessiun «extra muros» ad Arosa è stada l'elecziun dal president da la regenza per l'onn proxim. En elecziun è stà cun cusseglier guvernativ *Christian Rathgeb* il vicepresident da l'onn 2014. Ils preschents han elegì il schef dal

departament da segirtad, giustia e sanadad sco nov president da la regenza e quai cun 109 vuschs da 116 vuschs valaivlas. «Per mai è quella elecziun davaira stada in mument emoziunal», ha ditg l'um ch'è dapi il 2012 commember da l'executiva dal parlament chantunal.

In carriera politica da 30 onns

El saja er stà fitg nervus avant l'elecziun e suenter avair prendì enconuschientscha dal resultat saja el sa calmà. «Dad esser per l'emprima giada en mia carriera politica da 30 onns president da la regenza è bler dapli che be in'onur», ha punctuà Christian Rathgeb. Jau vegn er a far cun

mia famiglia dumengia proxima ina pitschna festa. Christian Rathgeb è er pertschert che cun esser parsura da la regenza grischuna haja el considerablament dapli lavur, la quala el exequeschia cun plaschair ed engaschament. Christian Rathgeb è cun corp ed olma in vair liberal ed in um dal rom sch'i va per giurisprudenza. El ha fundà il 1986 la Partida liberaldemocratica dals giuvens en il Grischun, el è stà deputà ed il 2009 president dal cussegl grond. Avant trais onns è el vegnì elegì dal suveran grischun sco cusseglier guvernativ e successur da cusseglier guvernativ *Martin Schmid*, oz cusseglier dals chantuns.